

## Nggalatiyaya

*Deleewar Mbulus chireethleng nən  
Nggalatiyaya dā*

<sup>1</sup> Kyagha deleewar dāba ya a har Mbulus, tæthlænda Yeeso Kæræsti, mbæ nafiya nduwa niifa aagha nggi wa, amma Yeeso Kæræsti tæ Faara na Chindi, thlengga Yeeso sæ ahu mærra.

<sup>2</sup> Shayina na heu na a thlæmanna kanda a ndang 'ya fatakkwaya kængya hwan Faara fa na a Nggalatiya.

<sup>3</sup> A tsauka nggayirha tæ dædemnggirha yi Faara na Chindi tæ Chinæm Yeeso Kæræsti tæ kun.

<sup>4</sup> Ndæghænni færga yibædghæn ka dæmiyid næm a hærghanggæn kæm ahu kæshiid mbælfeddi nanæm sæ ya, kæla sakhna Faara na Chindi.

<sup>5</sup> Færaman mamnggirha Faara pakwandæ. At-saukake.

*Labara na Mbænggæn tal ni*

<sup>6</sup> Kæs ænwulteena nggi. A hu bængya ngguchit na minnun sæ a malanggun Faara wurgha kun tæ nggayid Kæræsti kækær. Tærga minnun kyaharra hu weerinda “Labara dæ na Mbænggæn” pak.

<sup>7</sup> Amma kækafek mbæ “Labara sæ na Mbænggæn” pak wa, amma na nafiya sæ na a tsang teena kun na mindan sæ a mbedeng ngganda kækafekkid Labara hai na Mbænggæn yi Kæræsti.

<sup>8</sup> Amma ko kæmni, nduwa tæthlænda Faara a talara hai, a pærang labar Faara kun pak ma yandiyā, na Faara a shiwang nda.

9 Kəla 'wa nan teena pər đan ndən kətəm, niya nggər pəranggən kun, a pərang niifa labara kun pak ma yandı pərang nan kun ya, na Faara a shiwang nda.

10 Nana minnasə a thləgha fiya nggi fa wa, nduwa Faara wa? Nduwa tamnggun ndaarha nana minna sə a thlək 'ya ni na a mbənannggən fiya wa? Awo, andam niyi a thlək 'ya na a mbənannggən fiya kee, kam tsauki mafad Kərəsti wa.

### *Wurna Faara Mbulus*

11 Shayina, na minna sə a sənunsə, labardi na Mbənggən pər ni kyawa ba a mii niifa wa.

12 Mbə a har niifa thləni labardiya wa, tə kəm mbə niifa ni tsahegha ndən ha wa, Yeeso Kərəsti tə altenggən kedeegha ndən.

13 Sək đun tur tsawud na kaar tam ni a takkwa Yahudaya, səsang ni fatakkwaya Faara, har na minna sə na a bəlanggi kanda.\*

14 Səndunsə kal di fingya shayina tsənan sə hu takkwa Yahudaya aten sərək əntin chichiya nəm.

15 Amma Faara tə nggəm ndəghən wurghən nggi kapa na nda nggət nggi, aah də nggi hu nggayidghən, təkədə mbənda fa

16 kedee Wanggən təni pər labara atenggən a pathlang nafiya mbuwa Yahudaya. Katəra nən hai kee, tsahanggi mee niifa wa.

17 Dəwi Urshalima də a thləmad fathlengya də 'wagha ma nggi wa, amma kəs kwamana ni a chehweed Arabiya də, tsəbaku wudi a wupəri Ndimaska ba.

---

\* **1:13 1:13** Tar Fathlengya Yeeso 8:3; 22:4-5; 26:9-11

<sup>18</sup> A kwasamad huraya mahan ndən dəni a Urshalima də, di na Mbiturus. Tsawi təghən yi bəngya kumkap tuf.

<sup>19</sup> Nawi fingya fathləngya wa kəl Yakubu wanman Chinəm.

<sup>20</sup> Əndi chireelth ni kəkafek ni, mbiyi a nggabərha wa, a mbed Faara thləkni ndən.

<sup>21</sup> A kwasamadghən wii ahu Chehweed Suriya də tə Kelikiya.

<sup>22</sup> A sayiddi fatakkwaya Yeeso na ahur Kən hwan Faara na a Yahudiya, səngwanda nggi tafan ndan wa.

<sup>23</sup> Sək fiya ndaarha, “Niifda ni tamngga səsang kəm ya ndəghənni na a thlək labar fərkəkafek na midghən bəlang nda kaar.”

<sup>24</sup> Fal nda Faara kəsər ka nggi.

## 2

### *Fingya fathləngya Yeeso thlənda Mbulus fa*

<sup>1</sup> A kwasamad huraya kumkap fada nggəryi wutta a Urshelima də. Nggi tə Mbarnaba wudgha də, tahang nggan Titus hadə kəm.

<sup>2</sup> Dəghi mbəfadə kəsər Faara ndən kedəegha ndən ahu səsəna 'ya na midghən a əne. Səl ni a mbəda də tsawan hai tə shingya Kən Faara bəbee. Thləghang Labar dani kanda na Mbənggən yandı pərang ni fingya mbuwa Yahudaya. Na minna sə a sənise nadə pəpəla dan na tsaurha mere.

<sup>3</sup> Pashid wiid na Titus, ko nanən tə Helenarha ni, mbə niifa sə ndangga tətani a thləng muwa nda wa.

<sup>4</sup> Thliigha labar da sə ya kəsər ka fingya shayinəm fa nggabaya kyagha ba bəbee. Kyana nda

ba ka sɔ́bang ngganda wal alteena dɛ nanɔ́m tɔ́ghɛn ahu Yeeso Kɛ́rɛsti, na mindan sɔ́ a tsawang ngganda kɛ́m mafaya.

<sup>5</sup> Amma nggɔ́mang ngwan kanda fa ko ngguchit wa, kɛ́sɛr na minnan sɔ́ a kɛ́s kɛ́kafekkid labar da nan ha na mbɛ́nggɛn ya ka kun.

<sup>6</sup> Amma fingya kamngga a na nda mamngya, mbɔ́ 'yasɛ djidegha tɔ́ wunni kanda wa. Mbɔ́ Faara a tattaha wa. A hur mamnggini mbɔ́ 'yasɛ chik nanda aten labar na wa.

<sup>7</sup> A meyedghɛn, tɔ́r nda ndaarha fɛ́rena Faara taara na a pɛ́rang labar da ni na mbɛ́nggɛn ya a fingya mbuwa Yahudaya, kɛ́la fɛ́rang nɛ́n taara Mbiturus a pɛ́r labara nɛ́n na mbɛ́nggɛn a Yahudaya.

<sup>8</sup> Kɛ́sɛr Faar dani ɛ́nagha taara ahur Mbiturus kɛ́sɛr a tsauka tɔ́ thlɛ́nda Yeeso a Yahudaya, ndɛ́ghɛn ɛ́nagha taara kɛ́m ahur na a tsawi tɔ́thlɛ́nda Yeeso a nafiya mbuwa Yahudaya.

<sup>9</sup> Nda Siman Mbiturus, tɔ́ Yakubu, tɔ́ Yahaya kandani sɛ́nna nda fɛ́rang nanda mamnggid fa-takkwaya kanda, thlɔ́ kanda fa kan tɔ́ Mbarnaba tɔ́ hura tɔ́tal. Nggɛ́m dɛ́n fa a dɛ́n thlɔ́ghang labara Faara fingya mbuwa Yahudaya, kanda kɛ́m dɛ́nda a thlɛ́mad Yahudaya dɛ́.

<sup>10</sup> Ndangga nda kan a nan naarha dɛ́l fa yami-  
iya in kee, nggi kɛ́m ɛ́nda ni na mina a ɛ́nee ya ka kɛ́tɛ́m.

### *Yanang Mbulus Mbiturus a Antakiya.*

<sup>11</sup> Bana Mbiturus a Antakiya ba, tɔ́rgha yanang dɛ́ hu yidghɛn sɔ́, kɛ́sɛr ka 'ya ɛ́nanɛ́n mbuwa ngga.

<sup>12</sup> Kapa na fingya yini thlønna Yakubu kanda sēla ba, na Mbiturus yakh hēb ənnarhami tē fingya mbuwa Yahudaya fərgha kəkafek. Amma a kwasamaddi sēlna nafina ba, tərgha kyanggən fadghən mu nggərwa hēb ənnarhami tē fingya yini mbuwa Yahudaya wa, kəsər nəghən a tərəm nafiyini na mindansə a thleng muwa nda nafiya mbuwa Yahudaya.

<sup>13</sup> Nanən kee, fingya Yahudaya na Kərəstaya takkwanda thlərbuyid Mbiturus, tsang teena nda Mbarnaba kyangganda hu thlərbuyid ndan hai.

<sup>14</sup> Amma kēla ni hai mba nda a takkwa kəkafekkid labar Faara wa, ndanggi Mbiturus a mbed ndan heu, “Tsaunən tē Yahudarha ni sa, malangga takkwa ngyakhkya Yahudaya tsawana kēla nafiya mbuwa Yahudaya. Kama kəm na a kyang nafiya mbuwa Yahudaya ahu əntin Yahudaya hai?”

### *Hərghang nda Yahudaya tē fingya mbuwa Yahudaya*

<sup>15</sup> “Kəm kyab Yahudaya nggətgha kəm, mbə fa dīmiya kēla nafiya mbuwa Yahudaya wa.

<sup>16</sup> Təkēe, səndəm sē mbə niifa narha chahal a mbed Faara ka nanən a takkwa deleewar ngyakhrha Musa wa, amma kəl fərəkəkafek a Yeeso Kərəsti. Nanən kee, kəm kəmda fər dəm kəkafek a Yeeso Kərəsti nəm a naarha chahal hu Kərəsti mbə takkwa ngyakhrha wa, kəsər a nadəm a əna taara tē ngyakhrha mbə niifa sē na naarha chahal a mbed Faara wa.

<sup>17</sup> Ana min nəm sē tsawum chahal a mbed Faara hu fərəkəkafek tē Kərəsti, ba nda wal kəm tē dīmiyirha kəsər ka malang nəm takkwa

ngyakhrha. Kyad nən ndarha kyang na Kərəsti kəm hu dimiyirha wa? Awo, ko ngguchit.”

<sup>18</sup> “A nadi a nggər tənang nda əngya chang ni hai kaar, tsaudi tə dimiyirha.

<sup>19</sup> Kəsər ka tsahad ngyakhrha Musa tsaudi məmərə aten ngyahaddi, malang di əna taara tə 'ya na midghən təni tsaurha yi Faara.

<sup>20</sup> Tawang nda suhurra fadna də tə Kərəsti. Nanənya mbə nggini tə tsaurha wa, amma Kərəsti ni na tə tsaurha ahur na. Nanən kee, tsawuddi nani sə təghən yi farha yi kəshiddiya fər ni kəkafek tə Wan Faara, nggəmngga nggi, fər nən altenggən ka nggi.

<sup>21</sup> Kalwi kəshibu tə nggayid Faara fa wa, kəsər ana dəm a wal nggayirha hu ngyakhrha, tsaudə mərgha Yeeso ka kee.”

### 3

*Takkwa Ngyakhrha nduwa fərəkafek a Yeeso wa.*

<sup>1</sup> Kun nurya Nggalatiyaya, wun mbəlfegha kun? Kyadang di ndən kun a pəpal mərəra Yeeso Kərəsti aten kadirha.

<sup>2</sup> Nanənya na minna sə a tsahang mee ni kun tətəl kee. Thlənun Səsən Faara ka labar ngyakhrha Musa wa, nduwa fər nun kəkafek ka labara sək nun aten Kərəsti wa?

<sup>3</sup> Tur nuryid mani əna nun ya? Katərang nggun tsawun nun hai hu Səsən Faara, amma kama na minnun sə ngwalang nda hu tar thlu farha?

<sup>4</sup> Səsən nun aten əngya hangga tsaudə ka kee wa? Kəkafek ni tsaudə ka kee wa?

<sup>5</sup> Niya nggər tsahang mee kun ha, fərang na Faara səsən nggən kun, əna ənwultengya nən ahur nun, kəsər ka nanun a takkwa ngyakrha wa, nduwa kəsər ka fər nu kəkafek tə labara səknun aten Kərəsti wa?

<sup>6</sup> Kəlaman Ibrahim, “Fərdə kəkafek tə Faara, ndən thlədang na Faara ahu tar nggayidghən hai.”

<sup>7</sup> A sənunsə, nafiya fərgha kəkafek a Faara tsau nda wangya Ibrahim.

<sup>8</sup> Labar Faara na chichirethlee hai ka kətəm kyaddə ndaarha fingya mbuwa Yahudaya, na Faara thlə kanda fa kəsər ka fərkəkafekkid ndan. Ndən pərang na Faara labara Ibrahim na mbənggən tə ndarha, “Na fiya heu a wal parka hai a fadwa”.

<sup>9</sup> Nanən kee, fingya fərgha kəkafek tə Kərəsti na nda a wal parka heu nda Ibrahim, kəsər ka fərkəkafekkidghən.

<sup>10</sup> Amma kala nafiya mbərsagha tə ngyakhrha shiwang nda kanda. Kəsər nəghən chichireethlee hai tə ndaarha, “Kala niifa ənawa taara tə 'ya na ahu ngyakhrha Musa heu shiwang nda.”

<sup>11</sup> Nanənya nəghən a pəpal tə ndarha mbə niifa wal nggayirha a nadə a takkwa ngyakhrha Musa wa, kəsər ndagha deleewar Faara, “Kala niifa natə nggayirha fa, nən a wal hərəkrha a fərdə kəkafek tə Faara.”

<sup>12</sup> Kwaman fərkəkafek nəghən pak ma takkwa ngyakhrha, kəla ndanən, “Kala niifa ənagha taara tə 'ya ndana ngyakhrha nən wal yibrha.”\*

<sup>13</sup> Amma nanənya Kərəsti pəl də kəm ama shiwid takkwa ngyakhrha, tərang də dimiyid nəm də, a

---

\* **3:12 3:12** Livitikus 18:5

kwasamaddi tawang na nda dɛ a ten kadiirha, kəsər nəghən chichirethlee hai tɛ ndaarha, “Kala niifa waghəng nanda dɛ a urad dɛrha shiwang nda a mbed Faara.”

<sup>14</sup> Ahu Kərəsti Yeeso ni, fərangna Faara parka a nafiya mbuwa Yahudaya tɛ tur parka fərang nən Ibrahim, kəm na fa fərkəkafekkyā, hu kəkafek tənəm wal Səsəna tɛ Pedənda dɛfna Faara miighən.

*'Ya ndəghang ngga pathlang nda Ngyakhrha hai tɛ dɛf mii Faara*

<sup>15</sup> Shayina, niya fərang ənsakhrha kun aten əngya səsən nun sahai, ana nafiya sɛ səri kənanngga 'ya hai təkəm nggəm nda fa a tsauka kee, mbə niifa sɛ na mbedəng hai wa nduwa fəhwənggən dɛ wa.

<sup>16</sup> Faara dɛf dɛ miighən tɛ Ibrahim a chichiyighən. Ndawa Deleewar Faara, “Chichiya wa,” a fiya hangga, amma “Chichidwa,” tal ni kee. Chichiddiya Kərəsti ni.

<sup>17</sup> 'Ya niya ndaarha, dɛf Faara mee tɛ Ibrahim təkəm tsaudə kee. Bagha nda bə tɛ ngyahad Musa akwasamad huraya 430, mbə mbang mbedəng nda dɛfmidi ənana Faara kətəm wa.†

<sup>18</sup> Andam tsaudə əna taara nəm tɛ ngyahad Musa tənəm wal parkaya Faara, kam parka yini ya mbə bərha thləmad nəm bə kəsər dɛfmi Faara wa. Amma Ibrahim aten dɛfmi Faara ni wal nən parka.

<sup>19</sup> Ana dɛ kee, kən bəna nda bə tɛ tsahad ngyakhrha Musa? Chik na ndan tɛ tsahadda ha ya ka a kyad dīmiyid fiya nən a pəpal. Bəna nda bə təghən a kyat ndarha nən na nda a əna taara sɛ

† 3:17 3:17 Kyarhaba 1240



ta fardadē na chichiya Ibrahim a barhaba, nanən ndəghən ni dəfna nda miidfi atenggən. Fathlengya Faara ndən fərgha ngyahaddi ya, a har niifa hai na a pathlang nda niifa tē Faara.

<sup>20</sup> Nanənya tē tsaurha a pathlang nəm nən thlaara ana fiya hangga a kənanng pathla hai. Amma Faara na tal ənawa taara tē tətšaurha a pathlanga, a sayiddi dəf nən mee a Ibrahim wa.

*'Ya na mid Faara a tsauka Deleewar Ngyakhrha*

<sup>21</sup> Na ngyakhrha əna təsaryirha tē dəfmi Faara wa? Awo, sam mbə kewa! Kəsər andam na ngyahaddi fər weerinda yibrha, kam nəm wal nggayirha hu ngyakhrha.

<sup>22</sup> Amma ndagha deleewar Faara, kəshiiirha heu na nda a kamu səsəmnda dimiyirha, nanən thlədəm dəfmi Faara yi hərəkrha hu fərkəkafek tē Yeeso Kərəsti.

<sup>23</sup> Amma kapa na sayid fərkəkafek barhaba, ngyahaddi ya kənanng də kəm kəla porsənaya, kəl sayiddi na fərkəkafek a kyarhaba.

<sup>24</sup> Nanən kee, ngyakrha kəlagha kəm ha kapa na Kərəsti barhaba, ndəghən lafgha kəm tənəm tsaurha tē nggayirha a mbed Faara hu fərkəkafek.

<sup>25</sup> Nanənya bəna fərkəkafek ba, mbə ngyakrha ni a kəla kəm ha balwa.

<sup>26</sup> Nanənya tsaudun ka wangya Faara kəsər ka fərkəkafekkid nun hu Yeeso Kərəsti.

<sup>27</sup> Kəsər kun heu ənang nanda mbaptisəma kun hu Yeeso Kərəsti tsaudə kaldun Yeeso Kərəsti fa.

<sup>28</sup> Balwa aarha sə tē Yahudarha nduwa fiingya mbuwa Yahudaya wa, mafarha nduwa niifa

mbuwa mafarha wa, hëshnefa tə nuneefa wa. Nanənya kun heu nuwun tal hu Yeeso Kərəsti.

<sup>29</sup> A tsaufun yi Kərəsti, tsaufun ka wangya Ibrahim. Nun a har langad əndi dəfna Faara miighən aten Ibrahim.

## 4

<sup>1</sup> Niyi a ndaarha, tə har langaarha a bəldə wundakhne, kalwa mafarha wa, ko nanən əngya heu na ahur wuri di yighən ni.

<sup>2</sup> Nən narha ahar niifa kərang ngga sə ta far dəfə dəfna chin miighən.

<sup>3</sup> Nəghən kee kəm tə kəm kapa nəm sən kwaman Kərəsti, nəghəm kəla wundakhnaya, mafaya ni kəm hu səsəmgya səsən kəshiddiya.

<sup>4</sup> Amma a sayiddi bəna fardə bə, tərgha thlənggən wanggən bə nggətna nuneefa, nggətna nda kamu ngyakhrha Musa.

<sup>5</sup> Ka a hərghənggən fingya na a kamu ngyakhrha tənən tsang kəm wangya Faara.

<sup>6</sup> Nanənya tsau nəm wanggighən, ndəghən ni thləngə na Faara Səsən wanggən ahur nəm hai. Səsən diya aaghən Faara, “Abba, Pəpa.”

<sup>7</sup> Nanən kee, bəl wa mafarha ni sa wa, amma wan Faara. Tsaunən wee ni sa yi Faara, tsawod Faara tə har langadghən.

### *Billad Mbulus kaan aten Nggalatiyaya*

<sup>8</sup> Kaar, səngwa nun Faara, nun naarha tərang shilee dahaya in təkəm tsawun mafaya a fingya əngya mbuwa faarya.

<sup>9</sup> Amma nanənya səndun Faara, nduwa ndam kəm sən Faara kun, kama nda nun nggər wutta

ahu səsəmnda səsəngya kəshiirha də mbuwa tə shembe? Kama nun nggər tsaurha mafaya a ndəghən fadən?

<sup>10</sup> Nun kəs bəngya ha, tə ndəriya tə sayi tə huraya.

<sup>11</sup> Niyi a tərəmnda ka kun. Tsaudə səsanna mere ni sani fa ka kun.

<sup>12</sup> Niya hwan kun shayina, tsawama kəla nggi, kəsər nggi tsaudi kəla kun, mbə 'yasə 'wanun əne fa mbuwa ngga wa.

<sup>13</sup> Səndunsə sayiddi nana fadna bəe, ndən pərang ni labara kun na mbənggən a katəra bad na ba.

<sup>14</sup> Ko nanən bəerha faddi kyana billa də kun fa kaan, malee wun nduwa kar nggi nun fa wa. A meyedghən thlədun nggi fa kəla təthlənda Faara a talara hai, nduwa Yeeso Kərəsti fa tafadghən.

<sup>15</sup> Tək dən mbənda fa kaan a fardī! Nanənya, ai wutsəfayiddi əna nun ka nggi? Səndisə a fardī anadə a ənaarha hai kam kədang dən yiyi nun hai fəree kənun.

<sup>16</sup> Tsaudi təsar nun kəsər thləghang ni kəkafek kun wa?

<sup>17</sup> Nafiniya kəs nda kun ha ngga, amma mbə hu kwamana na ngga wa. Mbə mid ndan sə a wum teena nun tə nggi wa tənən naarha kala 'ya heu non naarha dərha thləman ndan də.

<sup>18</sup> Ana niifasə na midghən sə a ənang 'ya nən kun na ngga nəghən ngga; malaman kanda ənaghən nda kətsar, mbə kəl nani a thləmad nun wa.

<sup>19</sup> Kun wanggina, katəra səri ni nanənya niya tək hatta nggətənun fa, tə kəm niya dərha mbeedə tə tur səsaddiya kəl ma tsau Kərəsti ahur nun.

20 Andam kwang niyi a thləmad nun nanənya, kam niya kyakhrang uradna hai. Kəkafek billadi kaan ka kun.

*Karapu aten nda Hadjara tə Saratu*

21 Pəremadghən, kun na minnun sə takkwa ngyakrha deleewar Musa, səkkun əndi ndana ngyahaddi wa?

22 Kəsər nəghən chichirethlee hai tə ndarha, wangya Ibrahim səri ni həshya, tal wee nggət na mafarha, tahadghən kəm wan nudı na tə altenggən.

23 Wan mafad nudı, nggətgha ndan kəla nanda nggət wundakhnaya. Amma tahad wandi na nggətna nudı na tə altenggən nggətgha ndan hu dəfrha mii Faara.

24 Nishyini kyab ya tsau nda ən sakhrha aten dəf mii Faara səri. Nuneefa yi tal, Hadjara, ndən tsauka wumnda Sənai thləna fiya ngyakhrha sə kyangga kanda hu mafayirha hai.

25 Nanənya Urshalima nəghən kəla wumnda Sənai ahu chehweed Arabiya, kəsər ndəghən tə wanggighən tsau nda mafaya hu ngyakhrha.

26 Amma tahad nudı, Saratu ndəna ameyed Urshalima na a talara, nəghən tə altenggən, təkəm manəm ni.

27 Kəsər nəghən chichirethlee hai tə ndarha, “Əno wutsəfayirha sa nuneefa na kwarenga mbuwa nggəta, tərang urad wa sə huhwana sa 'wa wagha tək hatta ngəta fa, kəsər wangya nudı malna chimadghən tsənda hangga, kal nda wangya nudı na chimadghən sə.”

28 Nanənya shayina, kun kəmda wangya dəfmeə ni kəla Ishaku.

<sup>29</sup> Kəla nanən kaar wandi nggət nanda yi thlu farha thleng də wanda fa nggət nanda tə səsəmnda Səsən Faara. Ta weeriba ya nəghən kee.

<sup>30</sup> Amma ndagha labar Faara kən? “Rəwu mafad nudiya tə wanggən, kəsər mbə wan mafad nudi har langaarha kyab tə wan nudi mbuwa mafarha wa.”

<sup>31</sup> Nanən kee shayina, mbə wangya mafad nuda ni kəm wa, amma wangya nuda ni mbuwa mafarha.

## 5

### *Wal alteena hu Yeeso Kərəsti*

<sup>1</sup> Kəsər Yeeso Kərəsti ndən hərəhangga kəm tənəm tək mbənda fa tə wal alten nəm. Nanən kee, ishama tə kanglanggirha hu fərkəkafek. A nggəm dūn fa nggər wun tsaurha mafayirha hu ngyakhrha Musa wa.

<sup>2</sup> Kama thləmarha hai, nggi, Mbulus, niya ndang nda kun, a nggəmdūn fa thleng muwa nda kun wa, tsaudə mbə 'ya sə dang na Kərəsti kun sə wa.

<sup>3</sup> Niya nggər ndang nda kun, kala niifa nggəmnnga fa thleng muwa nda, tsaudə tətə ni takkwa ngyahad Musa nən.

<sup>4</sup> Kunna na minnun a wal hərəkrha nun a mbed Faara non a takkwa ngyakhrha deleewar Musa, tsaudə kyang dūn alten nun sə hu takkwa Yeeso Kərəsti, nuwun inggun ma nggayid Faara.

<sup>5</sup> Amma kəm na hu Səsəna nəghən a kukwasang kəm fa ka a thlə nggayid Faara nəm tə fərkəkafek dəf nən miighən.

<sup>6</sup> A nadəm a takkwa Yeeso Kərəsti nda thleng nanda muwa kəm nduwa thlengwa nda kəm wa

mbə 'yasə ahurghən wa. 'Ya kamngga ndəna fərkəkafek tə nggəm ndan kee.

<sup>7</sup> A katəradghən kun a dərha mbeedə kaan, wun 'yadangga takkwa kəkafek kun fa?

<sup>8</sup> Huwuddiya bəwa bə a thləma Faara aagha kun wa.

<sup>9</sup> Mekhna ngguchit nən safang nda mburodi.

<sup>10</sup> Mbərsadi tə Chinəm ndən mbuwa nun sək mii niifa pak ma yina. Yandi na a billa kun ya na nda ngwang kumarha sə, ko ndəghənni wun.

<sup>11</sup> Shayina, andam bal yi a pər labar Faara aten thlee muwa, kəla ndana fingya niyi a ənarha, kama balna nda a səseerha? Andam balwi a pər labar hərəkrha hu kadid Kərəsti wa kam tsaukwi ən kii saara a fingya.

<sup>12</sup> Niyi a ndaarha nafini na a billa kun ya a nggushi tsau nanda firyə.

<sup>13</sup> Shayina, aah nanda kun ka a wal alteena nun, amma a tsawang dūn wal alten di ya tsawun hu səsəmnda dimiyirha wa. A meyedghən ngwa tsaukwa nggəmnda ahur nun non a ənang taara ndan.

<sup>14</sup> Kəsər ngyakhrha Deleewar Musa nəghən aten labara tal, ndəna, "Nggəmu tuladwa kəla alten wa."

<sup>15</sup> Amma ana dūn a kət ndan, kun a kii ndan. Kwarama, nun a bəlang nda ndan.

### *Səsən Faara tə yi thlu farha*

<sup>16</sup> Nanən kee niya ndang nda kun ana Səsən Faara a laf kun, mbun əna tar thlu farha wa.

<sup>17</sup> Kəsər 'ya na mid thlu farha mbə ndəna mid Səsən Faara wa, Səsən Faara kəm mbə midghən sə 'ya na mid thlu farha wa. Kanda kyab na nda

a yanda tē ndan, nanən kee, mbun mbang əna 'ya na minnun wa.

<sup>18</sup> Amma ana Səsən Faara ni a kəla kun ha, mbun nggər naarha a kamu ngyakhrha Musa wa.

<sup>19</sup> Tar thlu farha nəghən a pəpal, bəreukirha, tē kulafayirha, tē suna ən kəshirha,

<sup>20</sup> tē takkwa dāharha, tē thlərəfyirha, kar ndan fa, tē sərəkkirha, tē səbrha hura, tē nggəm alteena, tē ndəkrha hai tē ndan.

<sup>21</sup> Tē kəs ndan hur, tē sa mbaala, tē fingya əngya, niya kəs thləman nun kəla 'wani ənang nda kun kaar, tē ndarha nafiya na a əna tur əngginiya mba nda wal kutəryid Faara wa.

<sup>22</sup> Amma 'ya na Səsən Faara ənaarha ndəna, nggəmnda, tē wutsəfayirha, tē tsau dədəmnggirha, tē kərəsta, tē hakkilo tē nggayirha, tē kəkafekkirha.

<sup>23</sup> Tē sammayirha, tē kəs alteena, mbə ngyakhrha sə 'yadagha əngginiya wa.

<sup>24</sup> Fingya na yi Yeeso Kərəsti tawang nda ən thlu farha də tē ən mbəlfəeya heu aten kadiirha. Balwanda nda a takkwa tur əngginiya wa.

<sup>25</sup> A tsau dəm yi Səsən Faara, tama wiim hai kəm tē Səsən di.

<sup>26</sup> Ana dəm a taala wa. Ana dəm a səbang hur ndan də wa. Ana dəm a suna ən fiya wa.

## 6

### *Daman ndan sə*

<sup>1</sup> Shayina, a nadun niifa kyadə hu tar dīmiyirha hai, kun na tē Səsəna tē Pədənda wudaman hu kwamana ba na ngga. Amma ənamadghən tē sammayirha, kəsər nun də mukrha hu kəkərta hai kəmda.

<sup>2</sup> Daman ndan sə, anaɗun a ɗang sə ahu 'ya kiya ləɗang nun ngyahad Kərəsti.

<sup>3</sup> Ana niifa a numad ndaarha ka niifa manggən, amma mbə kewa, huk nən altenggən.

<sup>4</sup> Kowunni kəkəranggən targhən, a nagma a taala a tafadghən, mbə kəl kəkərang nən altenggən tə shadghən wa.

<sup>5</sup> Kəsər kowunni nən a tər rəfəd altenggən.

<sup>6</sup> Kala niifa tsahang nanda labar Faara ha, nən ndəghang ənggighən hai na ngga tə niifdi tsahangga ha.

<sup>7</sup> A nggaba ɗun altennun wa. Kəsər mba ndəndəlang nda Faara fa wa. Na niifa wumang ənnarhami ahu 'ya həf nən.

<sup>8</sup> Kəsər yandı həfgha yi thlu farha, nən a ɗang ahu mərɗa də. Amma a həf də yi Səsəna tə Pəɗənda nən a ɗang ahu yibrha də mbuwa ngwalarha.

<sup>9</sup> Nanən kee, a təkɗə kəm tə əna əngya na ngga wa. Kəsər a tək kwa kəm mal əngya nəm na ngga nanəm a ənaarha wa, na sayi bayi ba nəm halth yi parka.

<sup>10</sup> Nanən kee, a wal ɗum kwamana, tama ɗanggəm fiya sə heu, kəla shayinəm na hu Kərəsta.

### *Mii ngwala shawarid Mbulus*

<sup>11</sup> KƏLAMAN TUR CHIREELTH DI NA MƏMANGGƏN NIYA CHIREETHLENG KUN DƏ TƏ HARNA

<sup>12</sup> Nafiyini na a taala tə alten ndan, kanda ni na a ngyabang thlee muwa kun fa na mindansə ana kanda nda ngga. Na nda a ənaarha kee kəsər na nda a tərəm səsaddi na nda a kyarha sahai kəsər ka kadid Yeeso.



<sup>13</sup> Ko nafini thleng nanda muwa kanda, mba nda a takkwa 'ya ndaana ngyakhrha deleewar Musa wa. Na mindan sə a thleng muwa nda kun təna nda narha taala tə ndaarha kanda kyangga kun hu thlee muwa hai.

<sup>14</sup> Amma nggi kəm mbi tam taala tə altenna wa, kəl aten kadid Chinəm Yeeso Kərəsti. Kəsər sunanna heu tauda də aten kadiddi, Suna ən kəshiiirha heu kəm mərdə ahur na.

<sup>15</sup> Mbə 'ya sə hu thleegha muwa nduwa niifa thlee wa muwa wa, 'ya kamangga kee a tsauka niifa weerənda nggətta.

<sup>16</sup> Ngwa tsauka dədemnggirha tə nggayid Faara tə fngya takkwagha əndi thlək ni ya, kəmda aten ka nafiya Isəreela yi Faara.

<sup>17</sup> A kwasamadghən, a nggər dun billa nggi aten ənggini bal wa, kəsər kwad wundəyini na a fadna ya, kyaddə ndarha mafad Yeeso ni nggi.

<sup>18</sup> Nggayid Chinəm Yeeso Kərəsti, a tsauka tə səsən nun, shayina. Atsaukake.

**Hona Bible**  
**The New Testament in the Hwana language of**  
**Nigeria: Hona Bible**

copyright © 2023 The Seed Company in collaboration with Language Developers and Bible Translators Association

Language: Hona (Hwana)

Contributor: Language Developers and Bible Translators

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-18

---

PDF generated using Haiola and XeLaTeX on 26 Jul 2025 from source files dated 18 Jul 2025

d942b897-c376-5386-bfaf-e0ce21c59136